

Biografía di Elmer (Lem) Timoteo Pieters

Elmer Timoteo Pieters a nace na Aruba riba Klip, banda di Lagoen, dia 22 di augustus 1948. Su nomber di cariño ta Lem. Nomber di su tata ta Minguel Arcangel Pieters y su mama ta Francisquita Pieters Rodhes. Lem a crece riba Klip, pero despues di algun aña a muda bay biba banda di Watertoren na Playa. E ta e ultimo di 14 ruman, pues e ta e Benjamin di famia. E ta casa cu Ceferina Ludwina Pieters Pourrier y tin 2 yiu muhe. E mayor ta Luenne sigui pa Lianne. Donny su ruman ta toca trompet y un otro ruman Roque ta toca guitarra clasico.



Segun Lem, e bida artistico ta algo cu bo ta gusta, bo ta desplega bo talento, bo ta duna algo bon bek y bo ta ricibi satisfaccion.

Segun Lem tin biaha bo ta para keto y pensa con bo a satura den tur e cos musical aki.

E bida artistico a nifica hopi pa Elmer den su bida. Na prome luga, pasobra e tabata gusta musica semper. Na di dos luga, pasobra e ta desplega su talento. Di e forma ey tambe, bo ta sinti cu bo ta duna algo bek. Elmer su bida artistico a hacie cu e por toca na cas, na De Trupialen, na misa e por alaba Señor cu su guitarra y asina e ta alegra su bida. Bo ta alegra bo bida di tal forma, cu tin biaha bo ta para keto y pensa con bo a satura den tur e cos musical aki. Wak unda bo ta, wak unda bo ta aworaki. Wak con b'a prepara bo mes, wak con otro ta mira bo. Bo ta un hende respeta, bo a cambia bo bida di tal forma cu bo a bira un miho persona! Bo ta ricibi y duna bek. Esey e ta.

E bida artistico

E bida artistico a cuminsa ora cu Lem na edad di nuebe aña ta forma parti di e grupo De Trupialen. Elmer ta considera cu ta na De Trupialen su trayectoria artistico a cuminsa, pasobra ta ey el a siña canta y toca. Nan bisña tabata toca hopi bon guitarra y tur anochi e ta sinta cu su guitarra riba cura di cas. Tur hende tabata scucha y ta gusta e musica y canto. E tabata yama Wilfred Boyé, pero nan tabata yam'e Fèfè. Na De Trupialen bo tabata haya oportunidad pa bo siña toca tambe cualkier instrumento musical. Frère Alexius tabata dirigi e grupo aki. Door cu Lem tabata inkieto y e ta gusta bati tur caminda, el a scoge pa ta drummer! Anto cu su diesun aña caba e tabata toca drum y e tabata e drummer estelar di e grupo di junioren cu tabatin e tempo ey. E ta corda cu tabatin un drummer e tempo ey, cu nan tabata consider'e, un di e miho y famoso drummernan di Aruba. Ta trata di Hubert Brete d.f.m. Lem tabatin e honor di por a haya les di dje y tambe e tabata siña toca drum via musica di un disco! E disco tabata di "The Grand Miller band" y e tabata haya un buki cu tur e notanan. Asina nan a sigui den Trupialen. Roque, kende ta ruman homber grandi di Lem, ya caba a pasa den e periodo cu e no ta canta hopi mas, pasobra "el a haya baard in de keel" manera nan ta bisa.

Roque di cu nan mester di un hende pa toca baho. Poco poco Roque tabata instrui Lem con pa toca e instrumento aki. Anto asina el a haya hopi interes tambe pa baho. Pareu cu esey, Roque a siña Lem toca guitarra tambe. Kiermen, cos a bira hopi interesante, pasobra bo por duna presentacion caba! Como mucha di diesdos, diestres aña esaki tabata algo fantastico! Su instrumentonan cu el a keda cu nan te dia di awe, ta baho y guitarra. Nan a forma nan banda na De Trupialen cu nan a toca cu hopi placer. E tempo nan aya ta for di disco cu bo ta toca un cantidad di biaha, bo ta skirbi e letranan y despues saca e akkoordnan pa e cantica. Hopi cancion di antes di artistanan grandi di Venezuela, tabatin influencia na Aruba. Anto asina Lem a siña hopi riba su mes, di scucha, te cu ya bo ta bira un tiki mas conciente di musica y bo ta dicidi di bay les! Lem a composita diferente cantica pa Voz I Landia y De Trupialen.

Segun Lem, bo mes ta sinti cu bo a yega na un cierto nivel, pero bo kier bay un nivel mas halto



Dedicacion y estilo

Musica ta tuma basta tempo di preparacion y dedicacion. Bo mester wak ta con, ta unda bo ta, na ki nivel bo ta y ta unda bo kier bay. Anto segun Lem, bo mes ta sinti cu bo a yega na un cierto nivel, pero bo kier bay un nivel mas halto. Asina bo ta bay di nivel pa nivel. Bo ta tuma curso y cos no ta bay di dia pa anochi segun Lem, e ta tuma bo hopi aña! Tin diferente tecnica y tin biaha te hasta bo mester combina e tecnicanan pa yega na un bon harmonisacion. Lem a dedica mas tanto na musica folklor, balada y musica di antes door cu e ta toca den e grupo Rondalla (of: Rondaya) Universo. Banda di De Trupialen, antes tambe el a toca den e banda Los Condes.

Desaroyo musical

Lem ta activo aworaki den Rondalla Universo y ta activo ainda den De Trupialen. Tambe el a toca hopi aña den Misa San Francisco na Playa cu Sr. Irvin Provence y tambe na Scol di musica. Lem a participa na intercambionan cultural musical na Venezuela, Corsou y Boneiro.



Grabacion realisa

Cu De Trupialen, Lem ta corda cu nan a graba diferente disco compacto. Na aña 1999, Lem a graba su prome composicion di un cantica di Pasco. E cantica tabata yama Ban Canta Gloria Hubila. Na aña 1997 el a traha un CD di De Trupialen cu tur e canticanan popular.



De Trupialen
cantando y ariba
piano Juan Chabaya
(Padu) Lampe

Grupo musical cu a forma parti

Na un edad hoben te cu aworaki, Lem ta forma parti di De Trupialen. El a toca despues cu conhunto Los Condes. Na aña 1975 Lem a toca cu Trio Huasteca na Aruba Caribbean Hotel den Klompen Club. E mesun aña, durante un promocion pa turismo, el a biaha hunto cu Trio Huasteca pa Colombia. Nan a bishita Bogota, Medellin y tambe nan a biaha pa New York relaciona cu cu promocion pa turismo cu Gobierno ta organisa. Actualmente e ta activo tambe den Rondalla Universo.

Acontecimiento cu e ta considera mas importante den e bida artistico

E acontecimiento mas importante pa Lem, ta cu bo mester por separa cosnan den e bida artistico! Por ehempel bo mester por sa cu bo ta tumando mucho tempo pa bo mes, pasobra un artista ta riba su mes, pero tin otro factornan y otro hendenan cu bo mester tene cuenta cu nan! P.e. bo famia, bo yiunan y ambiente familiar, bo mester tene cuenta cu tur esaki!

Sugerencia pa futuro generacion

E sugerencia cu Lem kier duna ta, cu si bo kier dedica na musica, cuminsa tempran! Cuminsa na un edad hoben y cuminsa na un forma simpel, caminda bo ta haya gusto pa sigui cu ne. Bo mester brinda e muchanan di awendia tambe e oportunidad ey! Naturalmente awor, ya bo no por compara cu antes mas. E tempo aya tabata De Trupialen, pero awendia bo ta haya hopi maestro cu a studia musica y cu por pasa e conocimiento pa e muchanan. Importante ta pa e muchanan haya e calor, e sabor di musica, pa asina bira interesa pa nan bay practic'e. Si e bay forsa, Elmer ta kere e no ta logra,... e no ta logra. Esey ta Elmer su sugerencia pa e futuro generacion.